

Axun Erzibengoa | OIARTZUN

Gaueko kontzertuak ekarri zuen zalapartaren arrastorik ez zen arratsaldeko 19:00etan, Oiarzunen. Ordu horretan abiatu zen Haikaldia, Haikak antolatuta atzo eta gaur izango den jaialdia, eta horren isla ziren guneko bi sarreretan sartzen ari ziren gazteak. Ia denak motxilak, lo zakuak eta kanpin dendak gainean zituztela asteburua pasatzera zihoazen.

Haikaldian sarreran pasatu zuten kontrolak, baina, zerikusi gutxi zuen ordurako igaro behar izan zituztenekin. Izan ere, Guardia Zibilak arratsaldeko lehen orduetatik kontrol ugari jarri zituen Euskal Herriko hainbat tokitan Haikaldia zihoan jendea identifikatzeko. Oiarzungo sarrera-irteera guztietan zeuden jarrita kontrolak, baina ez han bakarrik, baita Zarautzen ere, autopistan, bidesaria ordaintzeko tokian, Nafarroako autobidean edo Zumarragan. Azken horretan Gasteiztik Donostiarako bidea egiten duen autobus bat gelditu zuten. Haikaldia zihoazen autobus ia guztiak kontrol batean ez bazen bestean gelditu zituzten —gazte batzuk hiru kontrol pasatuta iritsi ziren—, eta auto ugari ere gelditu zituzten.

Hala ere, poliki-poliki, Bizkaitik, Arabatik, Nafarroatik... Euskal Herriko toki guztietatik heldu ziren gazteak, eta umoretsu gainera. Autobusetik jaitsi eta Haikaldiko sarrerara hurbiltzean hala esan zuen gazte batek: «Hemen ere kontrola jarri digute?», eta ondoren irribarretsu pasatu zen kontrolgunetik.

Kontzertua hasi bitarteko orduak jendea iristeko eta kanpin dendak paratzeko hartu zituz-



GARI GARAIALDE

Haikaldiko lehen orduak kanpin dendak jartzen igaro zituzten gazteek.

Abian da Haikaldia

KONTROL UGARI. Ehunka gazte hurbildu ziren atzo arratsaldean Oiarzunera, Guardia Zibilak kontrol ugari jarri arren

ten, batez ere. Kanpalekua handia zen, baina Haikaldia abiatu orduko antzeman zitekeen dendak perretxikoen moduan ugalduko zirela. Eguraldi txarraren beldur batzuk hutsik zegoen negutegi baten barruan jarri zituzten dendak.

Konpromisoak berretsiz

Eta denbora pasa ahala, jendea eta jai giroa ugaritzen joan ziren. Haikaldiaren antolatzaileek ere hori nabarmendu zuten. Garikoitz Mujika Haikako kide-

ak EGUNKARIArekin izaniko solasaldian oroitarazi zuen ez dela Gazte Topagune bat, jaialdi kutsua duela erantsiz. Hasi ere txupinazo eta guzti hasi zen, jai moduan, eta atzoko eta gaurko kontzertu eta txotx erraldoia ere horren adierazle dira.

Jai giroa nagusitu arren, duela urtebete Haika sortu zenean hartutako konpromisoak berresteko modua ere badela azaldu zuen Mujikak. «Frantziaren eta Espainiaren erasoan aurrean Euskal Herriaren indepen-

dentziaren alde lanean jarraituko dugu. Nahiz eta gu atxilotu edo kartzelatu jarraituko dugu, *Gurekin jai dute* leloak adierazten duen moduan. Hori masa ekitaldi batean islatu nahi izan dugu», adierazi zuen.

Atzo, Skalariak, La Polla, Tonino Carotone edo Anestesia-aren txanda izan zen. Gaur, Tapia eta Leturia, SA, Sen, Kashbad, KOP edo Etzakit, baina ekitaldi politikoa ere izango da, eta espetxean diren Haikako kideak gogoratuko dituzte bertan.

LABURRAN

Jon Abril kazetariaren auzipetzearen aurkako helegitea aztertu dute Entzutegi Nazionalan

Jon Abril kazetariaren auzipetzea bertan behera uztea eskatzen duen helegiteari buruzko bista egin zen atzo Entzutegi Nazionalan. Talde armatuari laguntzea leporatzeko daturik ez dagoela argudiatu zuen Abrilen defentsak. Ezker abertzalearen ingurukoa izatea izan zen auzipetzeko oinarri bakarra, defentsaren arabera. Auzipetzea bertan behera uztea onartuko ez balitz, 5 milioi pezetako bermea jaiste eta 100.000 pezetatan finkatzea eskatu zuen defentsak. Auzipetzeari eta bermeari eustea eskatu zuen, aldiz, fiskalak.

Arakatzeko ordezkaririk legala ostiralerako deitu du Garzonek, 'Ardi Beltza' itxiko duela adierazteko

Ahoztar Zelaieta, *Ardi Beltza* aldizkaria argitaratzen duen Arakatzeko S.L. enpresako administratzaile bakarrari, ostiral goizeko 09:30erako deitu dio Baltasar Garzon epaileak. Telegrama bidez jakinarazi diote zitazioa *Ardi Beltza*-ko ordezkaririk legalari, eta bertan halakorik zehaztu ez arren, Espainiako Entzutegi Nazionalako epaileak aldizkariaren itxiera jakinaraziko dio. Hasieran, Pepe Rei kazetariari jakinarazi nahi izan zion Garzonek *Ardi Beltza*-ren itxiera, baina bera ez dela ordezkaririk legala esan zuen Pepe Reik, eta ez zion esan epaileari nortzuk diren.

MANIFESTAZIOA. Espainiako Kode Penalaren 578. artikuluan oinarritu zen debekua, «terrorismoaren apologia», hain zuzen ere

Ertzaintzak Ojedaren eta Basterraren aldeko manifestazioa galarazi du

Joseba Arruti | PORTUGALETE

Ertzaintzak galarazi egin zuen atzo iluntzean Portugaleten Joseba Basterra preso ohiari ongi etorria emateko eta Iñaki Ojedaren hilketaren 17. urtemuga gogoratzeko omenaldia egitea. «Terrorismoaren apologia» egin zitekeelako debekatu zuen ekitaldia Herrizaingo Sailak.

Manifestazioa abiatu behar zenerako plaza eta inguruko kaleak Ertzaintzak hartuta zituen. Hala ere, ehun bat lagun bildu ziren bertan, adierazpen askatasunaren aldeko kartelak eskutetan. Ertzainek debekuaz ohartarazi zituzten bildutakoak, eta sa-

kabantzeko eskatu. Handi aurrera, manifestari talde bat Portugaleteko hiriguneko zenbait kaletan barrena abiatu zen, eta zenbait kontenedore irauli zituzten. Ertzainak manifestariei oldartu zitzaizkien, baina azkenean kalean bertan omenaldi ekitaldi txiki bat egitea lortu zuten, Ertzaintzak berriro sakabatu zituen arte.

EHk Ertzaintzaren jokaera salatu zuen ohar baten bidez. Atzo Guardia Zibilak Oiarzun eta Ertzaintzak Portugaleten izan zuten jokaera alderatu zituen: «Ertzaintzaren alde errepresiboa Guardia Zibilaren argazki kalkatua da».



XOUSA SIMAL

Orube plazan bildutakoek adierazpen askatasunaren aldeko kartelak erakutsi zituzten.